



皇明名臣記第十卷

吾學編第三十一

榮國姚恭靖公

海鹽鄭曉



公名廣孝長洲人幼名天僖父欲公學醫曰兒不
樂爲醫願學諸生求仕否則從佛學至正間削髮
爲僧里中妙智庵名衍字斯道已又不學佛顧好
讀兵書尚謀畧兼爲詩學書嘗遇異人授占術輒
爲人決休咎與王賓高啓輩善厚亦與宋濂蘇伯
衡來徃徧游江湖洪武四年詔取高僧會病免八
年詔僧通儒者與官禮部試不得官賜僧服還山

十五年僧宗泐薦公因往來南京 成祖將之北
平乘間請曰殿下骨相非常英武冠世今皇圖草
昧東宮仁柔願厚自愛殿下試乞臣府中必有以
報殿下 成祖已稔知公意亦欲得公已而十王
之國會 高皇后崩 上曰王與一名僧誦經念
佛修齋公名在燕府籍中大喜至北平居故慶壽
寺公每夢與劉秉忠語 成祖時召入便殿密議
或歎息泣下公曰天之所興誰能廢之願厚自愛
靖難兵初起暴風雨 成祖意不說問公對曰飛
龍在天從以風雨元吉兵南行公送道旁言江南

有方孝孺者學行負盛名即不肯降幸勿殺當是
時獻陵居守公及郭資等日夜守禦輯拊兵民南
兵再攻城設伏截其後城上呼噪伏發急開門夾
擊大敗南兵去又夜縋死士下城劫南兵或遣數
十人遠伏草莽間夜舉火鳴砲罷南兵不得休息
輒出精兵奮擊敗之盡焚九門諸柵寨 成祖軍
中有聞見異事及兵進止輒緘書飛騎問公條答
附去並中機適靖難後爲左善世立東宮陞太子
少師復姚姓賜名廣孝輔太子南京 上令公蓄
髮再三終不肯從命嘗賜兩宮人逾月不近亦不

各目言 卷之十 二 三百六十七
辭 上乃召還兩宮人永樂二年賑濟蘇湖十六年來朝北京寓慶壽寺病車駕再臨視卒贈少師贈榮國公謚恭靖 上爲文神道碑洪熙元年侑享 成祖廟庭嘉靖九年移祀大興隆寺罷侑享

尚書宋公

公名禮字大本永寧人洪武中太學生爲山西按察僉事坐事左遷戶部主事謫戍寧夏建文初薦授陝西僉事辛巳又坐事除刑部員外郎靖難後命署禮部事俄陞禮部右侍郎逾月轉左永樂二年尚書工部或曰公爲陝西布政使召入工部爲

尚書時營北京公取材川蜀七年奪憂伐山通道深入險阻時下勅嘉公勞蹟九年治漕河已又入蜀十二年九載考績十六年來朝又入蜀是歲理獄江西十七年又入蜀是年病召還京理部事造番舟十九年造黃舟是年又入蜀公初治漕河濟寧與侍郎金純都督周長修復會通河置十五閘盡用濟寧同知潘叔正策役夫三十萬工十旬蠲租一百十萬石浚黃河故道用侍郎張信圖策與興安伯徐亨侍郎蔣廷瓚自祥符魚王口至中灤下二十餘里殺水勢河成賞功公第一長以徇私

虐人不得賞又於寧陽築堤城壩遏汶水盡入漕
河用御史許堪策疏洩衛河至海豐大古河入凡
四百五十七里役夫三千工一旬自是挽漕京師
罷海運公功最大卒之日家無餘貲洪熙元年呂
震言公卹典未備與葬祭正德七年始賜祠祀會
通河上公剛果質直有經濟才馭下稍嚴以故事
亦易集純泗州人洪武中太學生爲文選郎中江
西叅政召爲刑部侍郎扈駕北征歷禮工刑三部
尚書太子賓客所至有政績淮泗間治水功最著
卒贈山陽伯純寬和有容吏事幹敏宣德三年夏

暑勅法司疏獄純數會客宦女飲言官論純淹囚頌
繫錦衣獄 上念純老臣與致仕去純在刑部獻

陵嘗諭純及臺寺劉觀虞謙曰法司尚羅織言及
國事輒論誹謗甚無謂自今諸告誹謗者悉勿治
又嘗曰朕或嫉惡過甚處法失中卿等須執正長
天長人有膂力善騎射從靖難白溝東昌藁城戰
有功歷官督府治漕河卒贈萊陽伯謚忠毅又有
藺芳者夏人讀書通古今洪武中舉孝廉爲刑部
郎官知吉安府有惠政民思之坐事謫爲辦事吏
從治河濟寧復爲工部主事永樂十年以公薦陞

工部右侍郎清潔無私

湯陰伯郭忠襄公

公名資字存性武安人洪武十八年進士爲戶科庶吉士試主事戶部總部歷改湖廣陝西司爲真曉練錢穀陞僉都御史尚書郁新薦改北平叅議上言弊政陞叅政不數月進布政使靖難兵起公獻策防禦已而留侍獻陵居守李景隆攻北平晝夜扞備輯睦兵民轉給饋餉盡心瘁力不畏強禦靖難後陞戶部尚書上曰資朕蕭何也未閱月出掌北平布政司事即建北京置行部與維僉並

改行部尚書深見信用永樂十九年罷行部復爲戶部尚書時巡狩營建百費並興皆公調度獻陵卽位念公舊勞荐有寵賚立東宮兼太子賓客陞太子太師以足疾賜勅給半俸致仕復其家宣德三年夏公輟部務明年召公以太子太師掌戶部事免朝叅公益恭慎祁寒暑雨必入署視事不少休卒年七十三贈湯陰伯謚忠襄官其子佑戶部主事公受眷三朝屢登八座衣食僅充幾不能葬永樂後文臣贈伯四人金純山陽伯吳中荏平伯金濂沐陽伯

少師金忠襄公

公名忠鄞人少慷慨負義氣兄戍通州公省兄會靖難兵起布衣田冠上謁典儀云浙東奇士金忠願見殿下說兵事及中朝動靜得召見公言殿下太平皇帝小人耕江海間及來往齊魯道上聞殿下賢譽服人心久矣茲舉大事人材爲急成祖悅立授署紀善日侍帷幄贊理戎務尋陞署長史已爲真靖難後陞工部右侍郎治事北京永樂二年召入兵部爲尚書公博覽史籍議論河懸儲位未定上密問公歷數古昔適孽故事對上喜

賜公大鏹又曰詹事宮端汝以尚書兼詹事幸善調護佐太子公侍監國時時勸起孝敬篤友愛小心敬慎無失禮毀譽禍福聽諸天日而已或譖謗廷臣及官寮過者上密令公察審公退每數日頓首再三爲白無此事願陛下寬霽上或不喜即又頓首言臣敢保其無他他日有踪跡即如人言臣甘連坐以故諸所全護者多公謹厚不洩人亦不知也公每導人寬愛無爲苛刻公事輒推同官使展其才能有闕誤引爲已過不遺片善不念舊惡俸賜有餘周賑鄉族太子即位念公贈少師

謚忠襄以其子達爲翰林檢討達幼遺歸寧波學
支俸讀書比長景陵召達還翰林正統十二年改
禮科給事中陞都給事中景泰二年出爲長蘆運
使

太子少師儀文簡公

公名智高密人洪武中薦爲教官知高郵州高郵
人皆愛公曰知州長者陞知寶慶府寶慶人健悍
又畏敬公曰太守不可犯永樂二年選東宮官陞
通政兼右中允未幾陞湖廣布政使三年入侍郎
禮部十一年元旦日食呂尚書請賀如常公獨爭

議不可 上令吏部翰林院擇一老儒侍太孫明
日太子召問得人未蹇公及西楊薦公又曰人鮮
知智者以故議未決太子曰吾嘗舉李繼鼎大誤
悔無及如智誠端士然老矣西楊稱智起家學官
明理守正精神未衰廷臣中老成正大無踰智者
是日午朝 上顧太子問曰侍太孫講讀得人未
太子應曰舉禮部侍郎儀智議尚未決 上喜曰
得人得人智雖老能直言元旦日食智執議免賀
智可用公寬平嚴正務持大體尚忠厚遇事是非
又輒別白爲太孫陳說不屑附會年八十致仕子

銘字子新學于吳訥天性易直孝友舉經明行修
洪熙時爲行在禮科給事中贈父太子少師謚文
簡銘內府教書歷編修侍講正統中爲郟王長史
景帝初出南京爲禮部侍郎以立懷獻太子故加
太子太保未幾召爲兵部尚書尋掌詹事府事卒
贈太師謚忠襄

尚書郭公

公名璉北圻新安人初名進太學生永樂中爲戶
部郎官上知進進仕早未遑問學天資質直寬
厚臨事從容不見喜怒精練吏事簡約有條宣德

初爲行在吏部左侍郎兼少詹事上爲改名璉
四年代蹇忠定公爲行在吏部尚書罷兼職五年
冬上諭曰朕以用人之柄付卿卿宜爲朕擇才
昨郡守多缺命廷臣薦舉古人當斯任者必勤於
咨訪有得卽錄故官不乏才呂蒙正夾袋虞允文
材館錄是也慎留意正統元年除公尺籍時進士
李賢入選公試賢嘉禾詩竒賢輔相材授驗封主
事未幾旱蝗侍臣言大臣尸位妨賢內批令自陳
諸大臣遂皆乞去謝天譴公獨不可曰主上冲
年吾輩皆先朝簡任受付託一時請去誰與共理

各目記
卷之一
宜引罪乞改過璉老矣官至冢宰豈敢貪位顧君
臣恩義如此衆是公言疏上盡留諸大臣七年請
老先是宣德初內閣謂用人之柄不宜專在吏部
令三品以上京官薦用方面風憲郡守至公入吏
部又令五品以上京官薦用御史知縣人多嗜進
覓薦至行金錢相請乞言官論奏僅罷五品薦舉
公秉銓十四年名不及蹇公然潔廉務採實行不
用浮薄游聲譽之士雖爲內閣所侵能堅忍持正
自行其志

知府况公

公名鍾字伯律靖安人初以吏員事禮部呂尚書
震尚書薦其才永樂十三年授禮部主事二十一
年陞郎中初令五品上京官得薦士公薦右中允
張宗璉 上召問西楊曰人皆薦下僚鍾乃薦朕
宮臣耶對曰臣與王直擬薦宗璉不意爲鍾所先
上喜曰鍾能知宗璉即日陞宗璉大理寺丞宣德
五年擇郡守九人公知蘇州府賜勅乘傳之任公
初至郡佯不解事諸吏抱案環立請判公顧左右
問吏吏所欲行止公輒聽吏吏大喜謂太守愚越
三日公召諸吏詰曰某事宜行若願止我某事宜

止若顧欲我行縛諸吏拷掠投庭下輒死者數人
諸吏又皆大懼謂太守神明公乃盡覈屬吏斥貪
墨者五人庸懦者十餘人八年夏旱旣發預備糧
賑農俾得盡力於田畝復與周文襄公講究收糧
法由永樂間轉輸北京餉道遼遠糧長以一徵三
府二百七十萬石加徵至八百一十萬除正供及
僦車船費盡爲糧長乾沒議別立糧頭同收受互
覺察除免舊徵三之一以其二之一爲轉輸費餘
皆入濟農倉爲來年經費本是年馬草米數十萬
石及九年夏稅折布絲數十萬斤絹數十萬疋小

麥數十萬石及雜出供費並代以餘米上無通事
下無橫科民大悅每旱又輒發此餘米賑活輒數
萬人二十餘年積弊不戮一人而盡除民接邇終
歲在官不得負販公叙丁差歲不過三日盡罷其
在官者置綱運簿防運夫侵盜又置館夫簿防非
禮需索綜理周密簡約易行大抵公爲守專屬豪
狡拊善良勢家恣犯法立死杖下吏民大驚奉約
束寒門下士有行藝者時時賑贍諸儒生喜爲流
聲譽爭獻詩頌美有鄒亮者獻詩公稱賞欲薦于
朝會有以匿名書數亮過失揭府門者公得書笑

曰彼欲沮吾薦正速成亮名耳遂奏亮才學可用
召試授吏刑二部司務轉監察御史正統元年劾
御史王璉罪狀法司論逮璉歲滿去民叩闕乞留
者八萬餘人陞公正三品仍知蘇州府七年卒市
巷哭送其喪競立祠祀公公剛正奇偉潔廉之操
一塵不滓操履之固千夫莫回令行秋霜靡暴弗
馴惠流時雨靡悴弗煦國初蘇州知府有王興宗
者與葉春並爲皐隸事孝陵 上以二人老成不
貪以春爲鸞儀司副使興宗爲金華知縣李丞相
言興宗皐隸奈何爲令 上曰興宗勤而不貪又

善處事儒與吏不及也何有於縣歷陞南昌通判
嵩州知州懷慶知府會蘇乏守 上令胡丞相擇
人未及擬請 上曰莫如興宗改守蘇州有善政
陞河南布政使老歸又有魏觀蒲圻人博學有文
名歷陞侍讀學士授 太子諸王經遷祭酒謫知
縣召爲主事乞歸旣平吳守者非人 上思觀召
守蘇州觀至防奸撫善賑貧禮賢條平役賦報政
爲天下最陞四川叅政難其代復還觀守蘇後以
改府治於士誠故基及浚錦帆涇爲御史張度所
劾 上怒逮觀及高啓王彝並坐死未幾 上又

思觀賜葬祭

都御史羅公

公名通字吉水人永樂十年進士授御史巡
四川有風節永樂十九年奉詔言事與六科官並
謫邊知州正統元年爲戶部員外郎理宣府邊餉
陞兵部郎中三年從尚書王驥甘肅征阿台朶兒
只怕有功十四年冬虜報至公守居庸關給事中
孫祥守紫荆關廷議並授僉都御史時景帝初
即位面諭吏部誤云副都御史二人竟得爲副都
御史公守關有方畧才警敏擒虜酋那言帖木兒

提精兵五千南襲虜至拘羊山斬捕虜有功召入
叅贊軍務理院事景泰元年給事中言公本河泊
所官以內閣陳循薦其曉暢兵法尋陞副臺叅昌
平侯軍務今更兼院事妨誤戎機不便是年公疏
乞勅石亨楊洪各率精銳馬步官軍亨自紫荆出
大同洪自居庸出宣府沿途巡哨提督官軍堵塞
關口修理墻樁勦除賊寇防護耕種公又言邊軍
妄報首功虛張虜勢德勝之戰近在都門斬虜幾
何陞六萬六千有餘又言腰玉珥貂者皆苟全性
命忌能憎言于公謙不喜上言德勝當先一萬九

千八百八十人陞一級陣亡三千一百一十八人
陞二級餘皆給賞且乞罷兵柄六府部院翰林科
道議乞留于公亦言通志在滅賊爲國計無他謙
等宜同心協力勿互猜嫌是年公乞下令擒斬也
先伯顏帖木兒喜寧者賞萬金封公侯于公上言
口外軍民連歲被兵不能種藝恐虜寇野無所掠
擁衆以送駕爲名突至太原則山西搖動而河南
淮甸之間亦可憂矣宜選有謀略文職大臣徃鎮
山西 上以命公時昌平侯乞差文武大臣率兵
出鴈門用鹿角擡營護山西餽運大同兵部請命

公公意不欲行疏言于謙楊洪建此策乞令與臣
同行奏下于公疏曰當國家多事之秋非臣子辭
勞之日臣謙諳熟山西事情謙宜去 上仍令公
徃三年冬公言虜恃馬力出入塞下今也先使臣
有馬四萬宜增價酬之價重則馬益至不數年胡
馬自空此坐弱強虜之策也是年督兵逐虜懷來
至長安嶺又斬首有功龍門鵬鶚諸城殘破守將
撤兵內徙遺芻糧數萬公上言虜來有鄉導欲奪
芻糧守則軍力不足運則民財不足焚則國用不
足乞廷議戶部尚書金濂奏下公及總餉侍郎劉

璉總兵朱謙共計上巳而虜退公請班師還京協贊軍務四年上將傳要略命以訓練將士是秋與蕭維禎並陞左右都御史天順二年致仕弘治十八年隆慶父老奏巳巳之變通守關有保障功勅祠居庸關

太子太保陳僖敏公

公名鎰字有戒吳人永樂十年進士爲御史陞按察副使擢副都御史鎮陝西得便宜行事公慈厚寬洪清慎悉民疾苦不作聲色專務安輯凡練兵屯田水利鹽法事有經畫薦按察使王文副使金

濂入內臺正統元年與于公上疏請定輸粟贖罪法在陝十餘年教興政理每入朝民必遮道送不忍舍比還歡迎父老或走數程久旱公至即雨雨久公至必霽人益愛戴公召入臺爲右都御史與王文共事正統景泰間文與公更出鎮陝西巳而文當代公入陝御史爲文上疏言文風采乞留內臺耿清惠以侍郎出代公尋陞公左都御史太子太保景泰四年秋致仕卒謚僖敏陝人尸祝焉

武功伯徐公

公名有貞字元武初名瑄字元玉吳人宣德八年

進士庶吉士授編修陞侍講己巳之變有薦公才者召問計泣曰驗之星象稽之歷數天命已去請幸南京避虜于謙力言不可遂止 景帝即位勅十五人守要害屯兵爲京師援公權監察御史守彰德景泰四年秋公爲諭德兼侍講矣上言人臣避國諱子孫避家諱禮也臣幼誤犯祖諱禮當避請更名有貞是冬河決張秋石璞治之久無功集議文淵閣推公擢僉都御史治河公自北東徂南西踰濟汶沿衛及沁循河道濮范究源流度地行水上疏曰臣聞平水土要在知天時地利人事而

已蓋河自雍而豫出險之夷水勢旣肆又由豫而兗土益踈水益肆沙灣之東所謂大洪口者適當其衝于是決而奪濟汶入海之路以去諸水從之而洩隄潰渠淤澇則溢旱則涸此漕途所由阻然欲驟堙則潰者益潰淤者益淤今請先疏其水水勢平乃治決決止乃濬淤多爲之方以時節宣俾無溢涸必如是而後有成制曰可公往來展布經營作治水閘疏水渠渠起張秋金隄西南行九里至濮陽灤又九里至博陵陂又六里至壽張沙河又八里至東西影塘又十有五里至于白嶺灣又

三里至李峯由李峯而上又二十里至蓮花池又三十里至大渚潭乃踰范旣濮又上而西凡數百里經澶淵以接河沁公曰河沁之水過則害微則利乃節其過而導其微平其水勢旣成渠名廣濟閘名通源渠有分合而閘有上下凡河流之旁出不順者則堰之堰有九長袤皆至萬丈九堰旣設其水遂不東衝沙灣乃更北出濟漕渠阿西鄆東曹南鄆北出沮洳而資灌溉者爲田百數十萬頃公又參綜古法就長擇善加神用焉爰作大堰其上槩以水門下捍以長隄堰崇二十有六尺厚什

之長百之濶廣三十有六丈厚倍之隄之厚如濶崇如堰長倍之架濤截流柵木絡竹實之石而鍵以鐵蓋合土木火金以平水性又導汶泗之源出諸山滙澶濮之流納諸澤又濬漕渠由沙灣北至臨清凡二百四十里南至濟寧凡二百一十里復作放水閘于東昌龍灣魏灣凡八爲水之度其盈過丈則洩皆通古河以入于海上制其源下放其流旣節且宣用平水道初議者欲棄渠弗治而由河沁及海以漕又欲出京軍疏河公因奏蠲瀕河民馬牧庸役專力河防以省軍費紓民力工部請

如公言不中制以是得成功是役也聚而間役者
四萬五千人分而常役者萬三千人用木大小十
萬竹倍之鐵斤十有二萬錠三千緡八百釜二千
八百麻百萬斤荆倍之藁秸又倍之而用石若土
不可算然用糧于官僅五萬石爲日五百五十有
五君子曰元武之才徵於是役也白渠漑而不漕
鄭渠漕而不貢工皆累年費萬萬計匏子不漑不
漕又不以貢久後勞人至勤萬乘獻璧馬籲神視
張秋輕重難易何如也七年陞副都御史還朝公
負文武材臨事敢爲有經畧乃與石亨善竟以奪

門功陞兵部尚書華蓋殿大學士封武功伯食祿
千一百石世指揮使入內閣時內閣諸臣盡得罪
死徙落籍去公得爲首相欲立功名自異稍與石
總兵相左李賢旁助公凡用人行行政稍持正左右
已不能堪內臣曹吉祥亦以奪門功與國政不通
文墨恐事歸司禮力贊 上事須經內閣意籠絡
內閣附已已而吉祥薦用私人內閣輒相阻吉祥
固不悅天順元年御史楊瑄劾曹石曹石疑出公
意見之盛氣乞逮御史初曹石爭寵利不相能至
是遂合牽 上衣哭訴曰內閣專權欲除奴輩伏

地哭不已又言奪門時出萬死立功今爲內閣所
陷遂下楊御史及都御史耿九疇公及賢詔獄卽
日雷雹交作大風拔木承天門災二凶家大木皆
折冰雹尤甚不自安 上遂釋賢謫公廣東叅政
行至德州會有投匿名書斥朝政者曹石以爲出
公復逮詔獄拷治無驗命取公誥券示三法司刑
部侍郎劉廣衡等遂劾公詐撰制文竊弄國柄自
謂治水希蹤神禹敢以定策冒貪天功大不敬無
人臣禮論斬 上會災變得宥編置金齒四年冬
上坐文華殿諭賢王翱曰有貞才學亦難得當時

有何大罪爲石亨張軌所陷如後世議何可釋歸
田始得還鄉卒于家公短小精悍博學多能有膂
力天官地理兵法水利陰陽方術無不通貫文雄
奇詩亦遒勁

少保馬恭襄公

公名昂字志高滄州人鄉舉入國子監授序班正
統二年薦陞監察御史整飭大同兵備八年刑部
失囚堂上官下獄陞公刑部右侍郎改副都御史
叅贊甘肅軍務劾都督王喜喜坐罪戍遼東守臣
貢駝馬赤斤蒙古罕東諸蕃掠去公出戰擒大酋

鎖南奔景泰初病乞還朝勒致仕四年薦起總督
軍務代鹽山兼巡撫兩廣擒僞將軍周鐵等三人
陞右都御史七年平斗峒賊轉左都御史天順元
年致仕入見復留命巡視山西還院二年陳汝言
坐贓下獄論死代爲兵部尚書五年虜寇陝西公
總督軍務與懷寧侯孫鏜西征師且出會曹欽反
與鏜擊賊賊誅加太子少保仍掌部事裕陵每召
公對詢將官短長用邊鎮巡撫亦令南楊鹽山與
公議公質直肯任事曉暢軍務選擢將校多得其
人茂陵卽位改戶部尚書與都御史林聰簡十二

營軍公在戶部亦欲理財裕國用顧曲算濶狹會
計非其所長功名損於兵部時四年御史以星變
劾公公請致仕卒年七十八贈少保謚恭襄錄子
忠國子生子恕錦衣世百戶

論曰成湯立賢無方有以哉姚公廣孝籌軍旅宋

公禮成河渠况公鍾條賦役金公忠處君臣父子

兄弟間卒能調護猜嫌以終其身此其人豈易及

哉儀公智耆德有園綺之風郭公璉朴魯少文然

能持正不皦皦與人競亦不失已羅公通陳公鎰

皆有風節知兵曉吏事民思慕之馬公昂著功名

于南北邊本兵亦不失其職湯陰資不能救張北
平武功有貞不能全于肅愍興廢之際然乎

皇明名臣記第十卷

子履準校

孫心材重校

皇明名臣記第十一卷

吾學編第三十二

太子少傅劉節愍公

海鹽鄭曉

公名儁江陵人洪武十八年進士爲兵部主事累
陞左侍郎建文中爲侍中靖難後陞尚書公有材
力績密勤敏能出奇應變征交趾出叅軍有功還
受賞永樂六年趾賊簡定反出叅沐晟軍敗生厥
江被圍卒洪熙元年贈太子少傅謚節愍時都督
僉事呂毅陷陣死交趾叅政劉昱亦死毅項城人
百戶從靖難陞督僉送陳天平至雞陵關敗宥罪

從征克鷹揚將軍掌交趾都司事沉勇有智畧昱
武陵人嚴猛有吏才

少保陳節愍公

公名洽武進人淹貫經史謹敏有才識洪武中薦
布衣善書授兵科給事中憂去建文中起復文選
郎中靖難後陞右侍郎轉左改大理卿討交趾出
叅軍兼給餉交趾平覈將士功罪建授土官經理
兵食分守隘塞剖決如流皆中節適陞吏部左侍
郎是時黃尚書兼掌布按兩司事寬大專意撫輯
公甄拔才能振以風紀交人悅服還朝陞兵部尚

書鎮交趾仍叅軍事洪熙元年召黃尚書還公代
兼兩司事仍叅軍事未幾內官馬騏苛斂暴交人
再叛攻交州城敗賊去王通復引兵渡河擊賊戰
寧橋公力陳利害言賊狡有伏誘我不可出通不
聽遇賊公奮身力戰不支被賊執不屈罵賊死事
聞 上曰大臣以忠徇國一代幾人贈少保謚節
愍官其子樞刑科給事中時交趾布政使弋謙上
言乞褒死節贈都指揮李任都督同知指揮使顧
福劉順徐琪皆都指揮同知指揮僉事劉安指揮
同知正千戶蔡顛指揮僉事副千戶桂勝正千戶

知府諒江劉子輔諒山易先布政司叅政政平知
州何忠府同知內官馮智太監並復其家任金華
人襲父官靖難有功交賊獲都督蔡福福至昌江
城呼任等降任罵福叛君賊狗彘不如與顧福等
且守且戰前後三十餘戰輒破賊賊益兵象攻九
閱月糧盡衆困賊雲梯登城奪其門任復率死士
三戰三敗賊賊擁兵象大進不能支任福皆自刎
死智順自縊死城中人不肯降死者數千人子輔
廬陵人以太學生爲御史持身謹行儉約如布衣
用法公平不見喜怒巡浙江有風裁陞廣東按察

使坐累左遷守諒江撫民如子民亦愛戴子輔賊
攻城勢猖獗旁郡縣皆陷子輔獨效死守援久不
至食盡城破城中兵民盡鬪死不肯降子輔曰郡
亡我亡義不污賊自縊死一子一妾皆先死何忠
江陵人進士爲御史持正永樂十九年三殿災言
事出知政平州明敏有吏才居州廉慈忠計事上
藩司會寧橋軍敗賊乘勝逼城成山侯詭與賊和
且請赦朝廷賊遣酋陳渭老表謝密令忠勝同渭
老行請益兵征勦至昌江內使徐訓泄其謀賊拘
忠等欲降忠忠不聽刀鋸臨忠不降且鋸忠忠益

大罵賊勝亦不屈忠父子及勝同日死麒與顥守立溫賊攻城糧盡猶率罷卒固守城陷無一人降者賊屠城麒顥皆自縊死易先湘陰人國子生爲知府諒山有善政任滿當還交人乞留進三品祿留諒山城陷自縊死劉安征交趾功留官交趾前衛守備又安將還保東關至富良江遇賊被執安密與衆謀候討賊兵至內應千戶包宣以告賊賊將殺安安與指揮陳麟奮起奪賊刀殺數人自刎都督蔡福都指揮朱廣薛聚于瓚指揮魯貴千戶李忠皆伏誅福鎮守又安不與賊戰率廣等降賊

又教賊造攻具破東關時有官軍九千餘人發憤欲劫焚賊營福又遣百戶牟英告賊賊盡殺九千餘人遂攻破昌江等城又輒至各城說降至清化知州羅通罵福反賊宣德三年黎利歸福等京師盡棄市籍其家又有馮貴侯保爲交趾左右叅政討賊力戰死景陵卽位贈二人左右布政使

太傅曹文忠公

公名鶯字 寧晉人疏俊明偉內剛外和練達國契才量出人初鄉舉署代州訓導非其好也願得一劇官自效改泰和典史益肆力問學嘗督工

匠入京自陳願就禮部試宣德八年進士第一授翰林修撰正統五年陞侍講九年陞翰林學士十一年入內閣與政典制文詞宏潤日講音旨清暢尋陞吏部左侍郎兼學士是時東楊卒凡議大政諸閣老推決於公公才明敏類東楊視中官王振正色不少假振益憚公十四年沒土木贈太傅文淵閣大學士謚文襄改謚文忠賜衣冠葬官其孫榮錦衣世百戶

少保鄺忠肅公

公名塾字孟質宜章人永樂辛卯鄉貢士理刑都

察院以廉平名十一年爲監察御史時駕在北京有言南京鈔法滯衆謂將起大獄公往擒市豪一二歸奏曰市人聞令懼鈔法通矣事遂已十六年石州人告變擢陝西按察副使勅公事即實會官軍勦公察其誣乃反獄亡命妄言冀脫死聞上止弗問誅誣者宣德四年陝右饑移粟煮粥全活人公最清謹父又賢嘗市褐寄父父貽書罵何處得此褐者以不義汚我父教官公欲見父聘陝西考鄉試父又大怒罵辭不至歸憂服除陞應天尹與利去害市征田稅皆酌其平豪猾不得爲輕重正

統元年進兵部左侍郎時尚書王驥西征公任部
事有勞 上與除戎籍四年京師淫雨壞廬舍公
言此陰陽爲沴兵陰也臣等不職所致乞罷歸田
里不許久之進尚書時欲變易軍伍使南北人各
適土性下羣議公曰此舊制不可紊稍有變易將
不勝其弊咎將誰歸卒不動十四年 上北征虜
力止不允比出關又請回鑾王振惡公矯旨令與
戶部王尚書佐隨老營至懷安墜馬幾殆從者請
留就醫藥曰天子在前可託疾求自便力疾至雲
中還至宣府虜大至公再上章請疾驅入關而嚴

兵爲殿皆不報最後詣行殿力請振怒曰腐儒安
知兵事再妄言必死公曰我爲社稷生靈言何得
以死懼我振愈怒叱左右扶出明日次土木師覆
遇害贈少保謚忠肅佐海豐人永樂中貢士爲給
事中正統初陞戶部侍郎六年陞尚書十二年兼
吏部事佐狀貌魁梧器宇深厚政有體要心無苛
隘耻不若人晚嗜學問贈少保謚忠簡

論曰劉

雋陳

洽曹

鶴鄭

楚南

征北伐倉卒遇賊非

所謂以死勤事者耶劉陳宣力遐徼從事獨賢始
焉共命終焉效死可無憾也曹平章宥密鄭典司

名目言 卷之十一
戎政不能力爭於朝卒致萬乘蒙塵捐軀草野悔
無及矣

皇明名臣記第十一卷

子履準校

孫心材重校

皇明名臣記第十二卷

吾學編第三十三

海鹽鄭曉

侍郎段公

公名民字時舉武進人永樂二年進士庶吉士與
修永樂大典除刑部主事又與修五經四書性理
大全進員外郎郎中永樂十八年妖賊唐賽兒反
山東十九年冬陞山東左叅政討平之廷議擇守
臣當是時索賽兒急盡逮山東北京尼旣又盡逮
天下出家婦女先後幾萬人公撫定綏輯曲爲解
釋人情始安再駕征北虜勅公轉餉舟自濟寧至

通州俄又令陸轉居庸關出塞公節約曲算省財力民不擾事集道中忽降勅令公與巡按御史考所過郡縣吏宣德二年召考會試禮部三年召入戶部爲右侍郎湔剔奸垢出納清允尋改刑部特賜勅公廉介端謹令考察在京百司先是榜例越訴者杖百謫戍邊公請罪如律九年卒官貧不能喪吳文恪公力爲經紀始克殮成化間葉文莊公請褒公不果公好古力學精練吏事廉平勁直人莫敢干以私

都御史顧公

公名佐字禮卿太康人建文二年進士爲知縣莊浪拜御史巡廣西採木四川防守邊隘陞山西按察副使再陞應天府尹尋以營建冗棘改順天公歷兩京尹剛稜不撓貴戚豪勲斂戢永樂十九年貴州有夷警改按察使貴州或曰勲戚家不利公以故相排撼去獻陵素知公廉健召爲通政使宣德三年臣僚奢縱御史多淫貪不法都御史劉觀被斥上問東西楊廷臣孰可掌憲者二人未卽對上曰未必乏人至此西楊言通政使顧佐歷內外臺有風采東楊亦言佐尹京威廉上喜曰

佐乃能如此擢右副都御史與璽書曰都察院朝廷耳目國家綱紀用得其人則庶政清平羣僚警肅否則百職怠弛小人橫恣近年在京諸司奸弊紛出司風憲者不能糾舉且與和同國何賴焉爾佐剛直廉正簡在朕心特畀斯任其竭誠盡力恪恭夙夜毋憚勤勞彈劾愆謬毋避權要毋枉良善毋縱姦宄各道御史即宜審擇凡廉勤公正老成醇厚者留用不達政體貪淫無耻及曾犯贓罪者送吏部降黜公差給假丁憂者亦如之御史缺行吏部慎選不得濫授欽哉公遂考覈御史貪淫不

律嚴暲等二十人謫吏遼東不達政體李孟宣等九人降典史老疾馮斌等三人爲民五年暲潛入京造詞脅人公又劾暲踪跡詭秘且欲殺臣上誅暲西市陞右都御史奸吏犯科者摺奏公受隸金私遣歸上以公臺端不欲發其過密示西楊且曰爾不舉佐廉乎西楊閱奏謝曰事有之顧中朝官祿薄僕馬薪芻咸資之隸遣隸隸得歸耕官得資費中朝官皆然臣亦然蓋自永樂至於今先帝固知之以故增中朝官俸上怒曰朕方擇佐用小人輒誣佐必下法司治對曰末事不足干

上怒請付佐治恩法並行矣 上召公授吏狀且諭曰此不足爲卿累小人不樂卿檢制敢誣正人汝自治之公頓首謝公呼吏至言 上命我治汝汝宜改行吾且貸汝 上聞之益喜數月又有囚告公久淹不理 上又怒召西楊諭曰此必死囚教之欲中傷佐立命三法司會鞫實出千戶臧清清殺無罪家三人奏當死繫獄 上曰不誅清佐安能行法立命磔清西市是年在告行在兵部右侍郎王驥署院事時 上數郊巡必勅公及勲臣居守八年又在告吏部尚書郭璉兼院事正統元

年開公尺籍二年公考察去御史邵宗宗九載滿在吏部 上爲原宗詰公公請老勅戶部復公家家居十餘年卒公性嚴重守正嫉邪人知敬憚以故竟擠之去公日晚小憇外廬立呵藤戶外官僚行道者輒引避入內直廬獨處小夾室非議政不與諸司羣坐先是有師達者東阿人長陵北巡嘗問 太子南京羣臣孰廉 太子對曰皆廉 上曰從朕北來者率好貨惟吏部侍郎師達一人廉耳達起太學生歷御史按察使堅貞有風裁靖難後陞兵部右侍郎改吏部領行在吏部事征胡總

軍餉陞南京戶部尚書兼領吏部達孝行純至操履端潔又有進賢向瑤洪武十八年進士歷職方員外郎九年滿陞通政使不能奏對自陳改應天尹建文中坐累謫廣西靖難後復府尹坐繫獄數年左遷運司判官獻陵知其廉直召為副都御史兼詹事宣德初蒞南臺致仕珪有文學屢經窮阨介節不渝蔬食水飲布衣泊如也

尚書耿清惠公

公名九疇字禹範盧氏人永樂二十二年進士宣德六年為禮科給事中議論持大體有清譽正統

二年兩淮鹽法大弊擢運司同知公性節儉嚴肅尤慎交接無毫髮私吏胥豪商勢家凜凜不敢肆嘗條奏鹽法便宜事著令內艱鹽場數千人走闕下乞留陞都轉運使嘗坐水旁童子曰水清不若使君清已而被誣逮下獄得釋又以都御史清理兩淮鹽法 景帝初陞刑部右侍郎屢辯疑獄勢利不能怵有婦訟其夫坐離異公不可杖其婦歸夫尋出理兩淮鹽法已兼江北巡撫歲凶盜起公善循拊流民復業者七萬家勅錄諸郡大辟囚寃得釋者二十六人有婦人來何苟家者去而死婦

家訟苟與弟殺婦苟誣服公疑釋苟兄弟已而竟
得殺婦者讐家也代還京景泰三年王文當出陝
西鎮守代陳鎰文不欲行諷諸御史留已公以侍
郎出陝西鎮守除弊屏貪威望益著先是巡撫多
部寺司堂上官文移不得輒下按察司不肯受約
束公奏得徑下邊將請增臨洮諸衛戍兵下公議
言邊城士卒不爲少將官能嚴紀律精練習勤撫
恤絕侵漁養銳氣一可當百加以賞罰明信人人
自奮不然徒冗食耳竟不增戍是秋勅公考察陝
西方面官四年冬陝西左布政使許資言侍郎鎮

守與御史不相攝文移輒礙改公右副都御史鎮
守會有旨市羊角爲上供燈公疏論曰昔宋神宗
買浙燈蘇軾諫止今買羊角製燈無乃類是書曰
不矜細行終累大德 上遂止天順元年公來自
陝西右都御史勅公考察諸御史是年諸御
史劾曹石逮詔獄并逮公降江西右布政使尋轉
四川 上知公清正一日對輔臣論人才言九疇
去非其罪南楊對曰九疇操行誠不易得未幾以
禮部召至京陛見 上憐其老改南京刑部尚書
曰遂卿優閑四年卒 上又曰可惜此老以左都

名臣記 卷之十二
御史蕭維禎代公公孝友純至居喪秉禮平生無他嗜好公退焚香讀書而已交遊不泛請寄不至其門雖權貴亦敬憚不敢犯論事是非確然不肯詭隨好善嫉邪別白太過以故與衆寡合累遭讒困卒謚清惠子裕自有傳

尚書年恭定公

公名富字大有懷遠人本姓嚴籍訛爲年永樂中鄉貢爲山東德平訓導乞修定先師廟配享從祀封爵禮儀召爲吏科給事中糾正違失務存大體陞陝西叅政巡歷郡邑察民隱革奸弊興學勸農

尤嫉賊吏正統九年陞河南布政使饑民流聚十數萬剽掠居民撫輯散解力行節儉却侈靡風俗爲之一變也先數侵邊陞左副都御史提督大同軍務舉廢政革科徵抑豪橫廣屯田民始有更生之望軍功爵賞必覈無濫襄垣王遜燂誣公公請老戶部言公廉威爲奸豪所忌不可許 景帝爲勅王守法度勿得汗風憲大臣卒吳淮誣公不法謂侵郭總兵坐總兵上于謙上議曰穰苴布衣監莊賈軍以軍法誅賈卒破秦晉齊以一穰苴故稱強列國裴度御史中丞督淮西諸大帥平蔡我朝

近日左都御史王翺右僉都御史鄒來學皆坐總兵上以軍令出翺等淮妄言沮軍法宜究主者事遂寢公又嘗按山西叅政林厚坐厚法厚亦誣公臺置獄訊 景帝曰厚怨富富執法公廉誣富得自便朕以邊事付富終不以一人言辱富厚竟削籍公又按分守內臣韋力轉貪虐力轉誣公巡按御史爲雪公誣狀事得已天順初石彪倚亨中公危法逮詔獄 上素知公南楊又力爲解得致仕未幾南楊薦賈銓爲戶部尚書召銓至又薦公左右不悅公者輒巧譖沮公 上諭南楊戶部非年

富不可對曰人多不喜富 上曰富執法宜可國計竟召公爲戶部尚書時王忠肅公年七十八上又諭南楊曰繼翺吏部非富不可公經理財賦蒞以勤廉不動聲色出納節適八年春陝西用兵督餉非人屢乏軍興公薦楊璿余子俊吏部疏論公侵官公上言薦賢爲國同心共濟若事輒任已動率尤人恐乖推讓之風自失寅恭之義且乞致仕不許公剛正朴忠簡言寡慾遇事直前不顧利害氣節才識世不易得卒年七十謚恭定

都御史軒公

公名輓字惟行鹿邑人永樂二十二年進士天性廉介進士督漕淮上嚴冬忽墮水援出裹被坐有司急進衣却去竟俟舊衣乾除行人司副陞監察御史正統元年與御史十六人出清理軍政清修苦節嚴明不苛人畏服之陞浙江按察使前使奢汰不檢公矯以清約禁絕和買四時一布袍蔬食不厭約諸僚三日出俸易肉一斤多不能堪故舊經過輒留飯飯惟一肉或至殺雞見者皆驚異曰軒廉使殺雞爲客大破費遭喪卽行僚屬尚未及知時守浙阮監丞隨亦清謹安靖與公善公旣去

陳璇代公亦清嚴浙臬稱治景泰四年公爲副都御史巡撫浙江改南臺內艱奔喪天順初首用公爲刑部尚書耿公爲右都御史二人廉介有名海內信向未幾耿公欲去石亨太果反爲亨逐去公亦病請致仕上召公至文華殿面諭留視公疾不可強與致仕陞辭上復問公曰昔浙江廉使考滿歸家僅二竹籠是汝乎公頓首謝又問卿年未老病愈再可用乎公又頓首辭疾上賜金爲道路費公去上復思公召爲左都御史督南京糧儲公嚴毅遇人無賢否悉峻拒不與接歲時詣

禮部拜表慶賀屏居一室撤燭朝服端坐寂無一言鼓嚴出行禮禮畢竟御肩輿歸僚儕聞公來輒避去不樂與公處南武庫郎沈琮嘗言留都大臣惟公及魏驥廉平峻偉不務文飾間令吏寫公牘數十冊卒後修史有司從其家取行實無有也公前有南海周新者永樂中爲浙江按察使廉梗有威爲錦衣紀綱中傷死獻陵每悼惜之人稱新爲冷面寒鐵公

都御史魯公

公名穆字希文天台人永樂四年進士爲監察

御史執法不撓獻陵監國時列上漢庶人不法罪狀留中陞福建按察僉事理冤濫懲貪墨摧豪強直介孤立行一意不可干以私泉州人有李姓者妻吳美舊與富姻林私李調官廣西林令二廉從李行殺李道中并殺其姪吳竟適林李宗人訴之郡郡得賂反坐李宗人誣又訴按察司司得賂如郡十餘年未決公故廉得踪跡甚詳一訊林即服漳富人許初無子後兄子已而妾有子與兄子貲三之一托已子許死兄子言妾子非許子也逐去盡奪其貲公大召縣中父老及許宗人詢之皆曰

妾子本許種也。兄子始服罪，超陞僉都御史，召入臺。正統七年，巡視應天府。公幼舉動異常，兒稍長，攻苦食淡，力學博經史，嘗大書座右，咬得菜根，百事可做。比入官，請寄不行，問遺並絕。義色正，詞清心寡，慾蒞政臨民，外嚴內恕，決疑應變，才氣雄敏。歷官中外三十餘年，家無餘貲，沒不能斂。公卿賻賻僅足棺衾。國初有薛祥，無爲州人，佐孝陵開國，有功，歷陞工部尚書，頗以怨言聞，下獄死。家徙瓊州。孫遠，進士，授戶部主事。天順初，使交南，還陞右侍郎。母憂，云起復爲工部侍郎，治河河南，尋鑿揚

州河四十里。成化初，兵討兩廣叛獠，改戶部調兵食，諭衆能破賊者，卽有其輜重。人人奮勇，師至大藤峽，賊平。陞左侍郎。三年，進尚書總督京儲。六年，行視漕河。十二年，致仕。又明年起，爲南京兵部尚書，叅贊機務。十六年，致仕。弘治八年卒。年八十三。遠於禮樂兵刑天官律曆無不涉，獵尤熟。國朝典故在戶部最久，文移奏劄悉出其手。改定戶部事例，芟繁正訛，均節委積。內外遠近多寡輕重，咸有品式。會校出納吏胥拱手時，中外競陳利害，始一人以爲可行而行，又一人以爲可罷而罷，公一切

弗聽遠居官四十年家無長物食無兼味室無媵
妾曰少吾事親恒不足今安忍有餘

尚書林恭肅公

公名鶚字一鶚浙太平人景泰二年進士初爲御
史時言官得志輒妄言摭據中傷人益交結橫甚
公獨持大體略細故嘗監試禮部內閣陳王子不
得舉誣考官劉文介公又以公兄子林挺得舉誣
公私挺逮挺考訊且并逐公及校挺文文固有辭
理事得白裕陵復位盡左遷諸言事瑣猥狹勢鴟
張者簡諸守正持大體者爲大郡知府公知鎮江

比辭召見賜食楮幣諭擢用意公至郡汲汲興利
除害不出一言暴前人短鎮江漕河孔道往經孟
瀆險議鑿河自七里港引金山上流通丹陽避孟
瀆公言迂遠多石又壞民廬墓請按京口閘甘露
壩故迹稍深浚通舟春夏啓閘秋冬度壩道里近
功力省又不損民壞地利甚便竟停役從公言未
幾更劇治蘇州公一切簡靖卽有建革必審覈再
三吳人重公名旦夕責效頗笑守迂緩已而見其
深思曲算圖久遠利卽又稱林太守康濟才也超
拜江西按察使平反冤獄必據律不肯輒重輕徇

上下意廣信有妖賊妄稱天神夏尚書等旁近邑
盡驚疑公榜縛其魁事遂解否且用兵或起大獄
歷兩布政使歲饑奏減民田租十五萬石嶺南有
獠寇急調兵食捍境上寇不得入境成化六年陞
南刑部侍郎審訊刑獄必從容調劑僚屬間務適
情法內艱去服闋召刑部侍郎時年未五十譽望
出諸卿右衆冀公大用未幾卒官貧無以爲斂黃
文毅謝文肅二公經紀歸其喪公秉禮植義造次
必恭慎公餘輒危坐閱書史臨古帖作楷書寢必
夜半漏盡卽起馭下稍嚴交遊不苟事母程淑人

極敬愛母不說跪請移時必母說乃起歷仕中外
二十六年家無益產篤行孝廉君子也嘉靖二十
二年御史趙大佑上公節行贈刑部尚書謚恭肅

都御史楊公

公名繼宗字承芳山西陽城人天順元年進士性
鯁直言動輒落初爲刑部主事獄中重囚數百久
桎梏多臭腐死公巡牢曰此曹罪皆死卽未死亦
宜善視時與食飲櫛沐蘇活人無算會廷議擇郡
守王忠肅公薦知嘉興府公携一蒼頭書一篋署
中蕭然如旅舍興學勸士閔農賑災夙夜不懈民

有事至郡和顏曲問盡得郡中諸豪奸及良馴狀
與民所疾苦爲調劑興革有孔御史者挾威凌有
司杖殺人公榜通衢孔御史酷撻人至死者言府
孔御史見之即之旁郡去嘉興當江南孔道內臣
往來百方索賂公直與菱藕曆日內臣曰我無用
此太守幸與我金錢或好布絹公曰諾即出牒取
庫金云與太監市布絹即索金錢又出牒取庫金
錢入饋曰布絹金錢在也幸與印券附案他日磨
勘內臣咋舌不敢受公有大節持風裁藩臬御史
皆憚敬公公在郡誅鋤奸豪盡束手斂跡但得駭

過即止不深究滿九載民遮道扶携不忍舍去爲
立生祠祀公陞浙江按察使公在嘉興廉聲正氣
滿天下比至浙臬威信益著貪墨吏望風走避盡
革諸司和市鎮守內臣橫日索供萬錢公一符下
杭盡革去未幾內艱一篋自隨惟衣數襲大明律
書數冊而已制終起爲僉都御史巡撫順天永平
戚宦庄田占民者盡奪還民成化二十一年上疏
忤旨左遷雲南按察副使弘治元年陞湖廣按察
使再陞僉都御史巡撫雲南卒於官公好善惡惡
出於天性與人不苟合人亦憚其方嚴居官二十

餘年所至民懷父母吏畏神明忠孝諒直光明俊
偉雖庸人孺子皆知其名或言公別白大明節目
太疏言論太激非知公者也

太子少保樊清簡公

公名瑩字廷璧常山人天順八年進士爲御史巡
兩淮豪有力者憚公清介莫敢撓阻條上清軍事
宜行之著令又巡雲南交人誘邊氓盜掠殺吏民
方議用兵公移諭禍福交人畏御史清梗皆納款
知松江府府故富贍公布衣蔬食孚於士民又議
折徵米穀減布縷征通幹漕法數事行之再知平

陽以黃孔昭薦陞河南按察使未幾尹應天府三
年陞南工部侍郎改都御史巡撫湖廣計擒錦田
賊酋散解其黨奏省諸藩王營造費金凡百萬計
尋以疾致仕薦起撫治鄖陽鄖襄流冗安輯馬鈞
陽又薦召爲南刑部侍郎雲南晝晦五日勅公考
察雲貴諸吏罷遣千餘人召還部爲尚書十八年
致仕正德三年逆瑾誣公妄理隆平侯事及擅減
上供布收贖奪其官比瑾誅公卒已三年詔復公
官十四年贈太子少保謚清簡公明習律令潔已
好修侃侃自樹交遊稀寡人皆敬而畏之

都御史熊莊簡公

公名繡字汝明道州人成化二年進士爲御史坐事謫清豐知縣累官都御史巡撫延綏操勵潔廉自甘蔬布餼廩有羨不入私室憂邊練武套虜三年不大入塞憂去家拜兵部侍郎陞兩廣右都御史逾年召入南臺正德三年中官李榮忽傳旨熊繡致仕公屏居山中斷絕書問生事蕭條俯仰益恬適卒時子巳天繼子又天巡撫秦金爲請于朝贈南刑部尚書明年太僕少卿何孟春上疏曰竊見致仕故都御史熊繡事母能孝事兄能友居貴

能貧居常能儉敷歷中外四十餘年守法徇公推賢嫉惡不邀時譽不急近功言無爽於屬垣行弗虧於顧影往年都御史戴珊張敷華卒其門生屬吏子孫咸請易名主事張鳳翔孔琦卒鄉人請卹其家 聖朝表勸清賢不吝恩需繡才節操履無讓珊等賜謚卹孤惟宸衷軫允幸甚詔給繡繼子子端米月一石謚莊簡時有工部侍郎潘禮歸德人清廉恬退未老乞休弘治間年八十一巡撫韓邦問疏言禮歷官居鄉益堅晚節草廬蔬食不求安飽詔給米月三石南工部尚書胡拱辰淳安人

名臣記 卷之十一
著勞績晚益清謹弘治間御史上其貧薄特給輿廩正德初遣行人存問年九十二贈太子少傅謚莊懿邦問亦仕至尚書致仕年九十二卒仁和有王琦字文進舉人乙榜授汝州學正陞御史山西僉事提學改四川乞致仕歸清介自持不治生產冬大雪寒僵臥不能出門戶或唁之曰吾求無愧於心耳雖饑寒無不樂也天順間竟以饑寒卒臨潼李崙字世瞻篤實莊重雖祁寒暑雨手不釋卷成化六年進士歷知廬州府陞河南叅政清慎絕俗吏事克修卒之日貧不能葬妻郝至饑寒守臣

爲奏上得給月米終其身沙河朱裳字公垂正德九年進士少勵清節貧困裕如也提學御史顧潛知裳檄府資裳學京師裳不受躬自炊汲爲御史寒約如故巡按山西山東有風采人稱裳爲長齋御史爲鞏昌知府歷浙江副使福建按察使浙江左布政使副都御史治河乞歸再起治河卒清堅自信士頌其廉民懷其惠知友服其不市名饒州孫需字孚吉成化八年進士歷官南京吏部尚書守法畏公議白首清風矚然不滓雖不能發揚功名有赫赫之譽顧正德間大臣多掎克回適需獨

以廉約稱卒贈太子太保謚清簡絳人陶琰字廷
信成化十七年進士歷仕至都御史三理漕事嘉
靖初爲工部尚書改南京兵部叅贊機務乞致仕
加太子太保歸琰宏才偉度累試繁劇卹國勤民
動著聲績中忤權倖屢進屢退方毅直亮喜愠不
形自奉儉節每飯一蔬徵行罷歸蕭然行李三竹
笥相隨者數十年卒年八十四贈少保謚恭介子
滋正德九年進士爲武選郎中論大禮謫戍南京
有梁材字大用弘治十二年進士常爲令守歷官
至戶部尚書清約自勵在戶部國有大役諸塞有
虜警節縮財用不肯加賦於民時翊國公郭勛寵
用事橫費度支金錢百萬計公力摧抑爲勛所中
傷削籍歸卒生理蕭然

尚書陳公

公名壽字本仁新淦人戍籍遼東成化八年進士
弘治元年以都給事中陞大理寺丞御史爭寺丞
劾公吏部尚書二原王公言壽廉正稱執法吏改
南光祿少卿陞卿南鴻臚十三年陞僉都御史巡
撫延綏十六年陞南京副都御史正德元年南京
科道劾逆瑾被逮公抗疏救諸言官瑾怒奪職八

年薦起巡撫陝西未幾遷南京兵部侍郎九上疏
乞休陞南京刑部尚書致仕初壽在科萬貴妃寵
族人橫甚中官梁方又結妖僧繼曉干國是公疏
論繫詔獄得釋在榆林會火篩入寇出奇兵却之
加俸一等既歸田杜門謝客陝西鎮守內臣廖鏜
暴虐吏民楊文襄公言公忠鯁輕去就宜起公撫
陝公至陝清勁鏜畏歛戢比公去陝人號哭擁公
不得行公卒久之都督楊宏陝人也上疏言壽仁
廉恤下知兵能遏虜請卹其後公歷官四十年大
半在散地食祿任事不久而廉名最著老無所于

歸諸子旅寓飄泊環堵蕭然歿不能葬久之親舊
相周僅歸其喪公爲言官時直論時政得失無隱
不喜彈劾人曰吾父戒我勿作刑官枉人若言官
枉人尤甚吾不敢妄言文襄公曰宋王素爲諫官
言人材難得無事之時當爲朝廷愛惜程明道爲
御史告君曰使臣拾遺補過則可若搜索臣下短
長以沽直名臣不能也本仁得之矣

論曰 成祖痛懲賊吏然左右大臣亦有好利蓄

貸聚馬者獨段公民以清謹受知顧佐耿九疇年

富三公皆有孝肅清獻之風屢遭頑讒非恃 聖

明幾陷奇禍軒軛魯穆林鸚楊繼宗陳壽五公剛

毅直方不可犯顧於民有惠政樊公瑩熊公繡清

譽字洽竟與時違不究其用

皇明名臣記第十二卷

子履準校

孫心材重校



